

Qanoq iliornikkut nunatsinni ujarak sanaartornermi atorluarnerusinnaavarput, qisunnillu eqqussuiarnerup annertoqisup apparsarnissaa anguniarlugu apeqquteqaat aallavigalugu oqallisissiatut siunnersuut

(Inatsisartunut ilaasortaq Aqqalu C. Jerimiassen, Atassut)

Akissuteqaat

Ineqarnermut Attaveqaasersuutinullu Naalackersuisoq)

Siullermeerneqarnera

Inatsisartunut ilaasortaq Aqqalu C. Jerimiassen, Atassut, qanoq iliornikkut ujarak sanaartornermi atorluarnerusinnaaneripput qisunnillu eqqussuiarnerup annertoqisup apparsarnissaa anguniarlugu apeqquteqaat aallaavigalugu oqallisissiatut siunnersuutaanut qujanaq.

Naalackersuisut suliniutit eqqussuineramik killilersuisinnaasut, sanaartornermi sanaartuutissat nunatsinneersut atorluarnerunissaannik siunertallit tamarluinnaasa tikilluaqqaat. Naalackersuisut isumaqarput tamakku najukkatsinni suliffeqarnermut inuiaqatigiillu aningaasaqarnerannut qaqugukkulluunniit iluaqutaassasut inuiaqatigiinnilu imminut annertunerusumik pilersorsinnaanissamut piujuartitsinissamullu ineriartortoqarnissaa ataatsimut isigalugu akueralugu.

Naalackersuisut Namminersorlutik Oqartussat sanaartornermut suliniutini nutaaliornissaq ineriartortitsinissarlu pingaartumillu sanaartornermut atortut nunatsinneersut, nunatsinni atortussiassanik piiakkanik tunisassianeersut sanaartornermiluunniit atortut piariikkat nunatsinni pilersinneqarsimasut atorneqarnissaat qitiutippaat.

Taamatut qitiutitaqarneq Namminersorlutik Oqartussat sanaartortitaanni nutaajunerusuni angusaqarluarsimanermik iluaqutaalereersimavoq, matumani sanaartornermi atortut nunatsinneersut sapinngisamik annerpaamik atorneqarnissaat piumasaaqaatigineqarsimalluni.

Nunatsinni sanaartornermut atortunik tunisassiornerit sanaartornermut inatsit nakkutilliinermillu aaqqissuussinerit akuerisat naapertorlugit pinissaat kiisalu tunisassiat sananeqataasa nassuiaataannik pilersornissaat pingaaruteqarput. Tunisassiornerit nakkutigineqartinnagit tunisassiallu sananeqataannik nassuiaateqartinnagit pilersaarusiormut siunnersuisartut sanaartortitsisumut, sanaartornermi atortut nunatsinni tunisassiarineqartut atorlugit sanaartornissamik kissaatilimmut siunnersuineramik akisussaaffimmik pisarialimmik tigusinissaat naatsorsuutigineqarsinnaanngilaq.

Naalackersuisut taamatuttaaq nunatsinni sanaartornermik suliaqartut sanaartornermut teknologiikkut ineriartortitsineq namminneq siuttuuffigissagaat tapersiiffigilluartassagaallu

pingaartippaat. Pisortat taamatuttaa q killiliusanik inissiisassapput namminersorlutillu inuussutissarsiortut sanaartornermi nioqqtissanik ineriartortitsissapput pilersitsillutillu.

Aallarniisussanut suliffeqarfimmillu aallarnisaasunut aqqtissiuussiniarlutik Naalackersuisut "Sanaartornermi atortussanut nunatsinneersunut piumasaqaatit" pillugit nassuiaasiorsimapput, taanna 2022-mi novemberimi Inatsisartunut ilaasortanut agguanneqarsimavoq.

Naalackersuisut isumaqarputtaa q sanaartornermik ingerlatsisuni sanaartoriaatsinik nutaanik, atortussanik nunatsinneersunik atuisunik maani nunatsinni, ajornanngippat ilinniarfeqarfiit attuumassutillit suleqatigalugit ineriartortitsisoqaruni iluaqutaanerpaassasoq. Tamanna siunnersuuteqartup eqqarsaataanut saqqummiusnaanut naapertuussorinarpoq, tassami issittumi sanaartornermut kalaallit siunnersuisartut suliasinneqartartullu misilittagaqarfiginerpaavaat ilisimasaqarfiginerpaallugillu.

Taamatut oqaaseqarlunga oqallilluartoqarnissaa qilanaaraara.